

## फिलिप्पीरालाई

### पावलए परींद ओरायो चिथी

आव चिथी फिलिप्पी मन्दलीलाई पावलए इयालखानानी परींद ओरायो ज़ (फिलिप्पी १:१३)। फिलिप्पीराए यादैज्याव दुखराल थोरिउर घतारक लिद यायुर सङ्गेद ओराएज्याव (१:२७-३०)। या मनी पावलए उदुखराल पोंखारिद धुरिद याएज्यावए पावलए उयुर होलाँ ताद रेंव ज़ उलिज्याव (१:३-५; ४:१०-१९)। फरी ख्रीस किताव उसजिमिसिउ, हिताव ज़ नोराए मनी ओदोरक लिन्या सतैसिउ लिज्या (२:१-११)। बलेज्याव पाँरानी ब जोगोइद ओरानैज्याव (३:१-२, १८-१९)।

१ गिन येसु ख्रीसए ओयेन दोज्याव ओनोकोरनी पावल सोनो तिमोथीनी गिन्ल्योनी, जे फिलिप्पीलाव येसु ख्रीसए छैव उमीर सोनो जेलोम्बार जेसेररालाई आव चिथी परींद गिन्याचिज्या। २ परमेस्वर गेबाबु सोनो गेप्रभु येसु ख्रीसनी जेल्योदा नियुँ गरौद जेयुँ होलाँ जैद ओयाचिरक।

जेलाई रेंद डायुँ हुबो ज़ लिज्या

३ डा जेलाई डाचेतैचिउ पती परमेस्वरलाई धन्याबाद चरैद, ४ जेजूनी परमेस्वरलाई डापोंखारिक एकतार रेंद ज़ डापोंखारिज्या। ५ काराव ल्यो ताकिन जे जेयुँ उहुबो छचामकिन ज़ परमेस्वरए चाव ओथा डारासथैक डालाई प्राईनी ज़ जेसघैनाके। ६ आव तोबो पाँत डायुँ हुपद ले — परमेस्वरए जेयुँलाव थूद ओनैज्याव चाव ओयेन भरी येसु ख्रीस फरी उहुन्या छचाम सयोद तुपैद्यान्या ले। ७ जे डालाई जेसघैनाज्यावए जेगुनर डा खर्क ज़ मामेंन्या ज्यासो लिज्या। डा इयालखानाल डालिज्याक ब, पाखात डालिज्याक ब, परमेस्वरए चाव ओथा डारासथैज्याक परमेस्वरए उयुँ ओयालोनी ज़ जे मनी डादैव येनत ड़ास सिप जेदोव मिताव ज़ ताके। ८ डा

जेस खर्क गेदैसिके लिद येसु ख्रीसए ओमयानी डायुं थू डाजैज्याव परमेस्वर साची लिज्या।

### पावलए पोंखारिद ओरायो

9 जेजूनी परमेस्वरलाई डापोंखारिक, 'या याल तयुं ताद इन ज़ ओखेनारक' लिद पोंखारिउ ज़ डानैज्या। नो जेखैज्याव अइज माःक, परमेस्वर किताव उलिज्याव लिद सरेसूद, चाव माचाव छुतैद खैच्यो। 10 हो ताकिन ची चाव पाँ भरी थरैद ख्रीस उहुक जेखत माल्यो छैवर तान्या जेले। 11 येसु ख्रीसनी ताज्याव चाव येन भरी जेक्याँत इन ज़ औरैःनाक। ननी ज़ परमेस्वरलाई ज़गै मगैव ताद उमिन ब इन ज़ घ्योःन्या ले।

### पावल झ्यालखानाल

12 अ डानैं डामेरं, डाक्याँत ताव माचावरानी चाव था इन ज़ थासनाके। 13 डालाई ख्रीसए ओयेननी झ्यालखानाल याझाःनाव दरबारलाव सिपाई भरी सोनो छुत मिंराए ब थैद नैर। 14 इताव डासहिज्यावनी फरी उपुर्काव गेदाज्यु भाइराए मनी प्रभुए ओल्योदा यायुं इन ज़ सुहुपुद ओपाँ माछेद ज़ यारासथैज्यार। 15 रूवा रूवाराए ते यामी जाँ तूद डाकिन सघ्योःसिन्याए जूनी ख्रीसए ओपाँ यारासथैज्यार। रूवाराए ते सोजोनी ज़ यारासथैज्यार। 16 नो सोजोनी सथैज्यावराए, 'चाव था सथैन्यात पावल खतैसिउ लिज्या' लिन्या सैद डालाई मया दाद ज़ दोज्यार। 17 नो ख्रीसए ओपाँलाई तँनी सथैज्यावराए ते छैव युंनी माःक, झ्यालखानाल डालिज्याक इन डायुं सुहुर्घान्याए जूनी यातिर वाज़ दोज्यार। 18 हैदी ब ख्रीसए ओपाँ जो मितावनी यारासथैदी ब डायुं माचाव मादोव, रेंव ज़ डालिज्या। सोजोनी तादी ब, सघ्योःसिन्यानी तादी ब, ख्रीसए उमिन ओथास्किन, हो ज़ प्राइरानी घेप्पा लिज्या।

### पावलए उयुं नेथोदा ओजैव

हैज, डा रेंव ज़ लिन्या डाले। 19 काराव ल्यो ताकिन जे डाजूनी

पोंखारिद जेयाँज्यावए सोनो येसु ख्रीसए उपुरूसए ब डालाई ओसघैनाज्यावए डा तछा आनी पुलुस्रया ज़ डाले है डालिज्या। 20 हैदी ब आव तोबो पाँत वाज़ डायुँ थू ताद आस डादोज्या — डा कातानी ब लाज मोर्नो डामाताक लिद आथ पाला मनी एकतारकाव डादोज्याव मिताव माछेःद ज़ डादोधुक। हो ताकिन ची डाबाँचिदी ब, ड़ासिदी ब, ख्रीसए उमिन डाक्याँत घ्योःन्या ले। 21 डाबाँचिदी ब ख्रीसए जूँनी ज़ डाबाँचिज्या। ड़ासिदी ब ड़ालाई इन पाथ ज़ लिज्या। 22 ख़ाली आव डाक्याँत जाँवा पै लिद ओयेन दाव डादैकिन हो ब चाव ज़ लिज्या। आव नेब्लोनी काताकाव रूजिन्या डा ड़ामासैए। 23 ड़ायुँ नेथोदा ज़ लिज्या। आव मानुवात लिज्यावकिन ख्रीसए ल्योदा बान्या ड़ायुँ लिज्या, नदा बान्या पाथ लिज्या। 24 ख़ाली जे जेजूनी डा आव मानुवात लिन्या ओचाहित लिज्या। 25 नो पाँ डा पक्का ड़ासैँज्या। ड़ालिकिन जेलाई पाथ पारैद परमेस्वरलाई जेयुँ हुपन्यात इन ज़ रेंद लिन्या डाजैचिरिज्या। 26 हो ताकिन डा जेल्योक फरी डाहुक जे येसु ख्रीसए डाक्याँताव ओदोव रेंःद जेसुनी इन ज़ च्याँःसिन्या ले।

### परमेस्वरए ओपाँत दुख सहिन्या

27 ख़ाली जे ख्रीसए ओपाँत लिज्यावरालाई उसहिज्याव मिताव दोच्यो। हो ताकिन ची जेल्योक हुद ड़ामीए ड़ारैःदी ब, आनी जेल्योक हुव ड़ामादैदी ब, ‘परमेस्वरए ओपाँत यायुँ हुपद तयुँ जैद थंरिद लेर दी’ लिन्या थैन्या ड़ाले। 28 सोनो, ‘याखिरी पसिज्यावरालाई रेंःद माछेःद परमेस्वरए ओपाँत जूँनी धामा दाव ज़ नैज्यार दी’ लिन्या ब थैन्या ड़ाले। नो खिरी यापसिज्यावत नेथो सरेस लिज्या — खिरी पसिज्यावरालाई परमेस्वरनिकाव सजा दैन्या सरेस लिज्या, जे मिताव सहिज्यावरालाई फरी परमेस्वरनी बाँचिन्या सरेस लिज्या। 29 ख्रीसलाई युँ हुपन्या वाज़ माःक, जेलाई

होए उजूनी दुख सहिन्या असिक ब याद नैचिउ। <sup>30</sup> आव डादुखल जे ब डास ज़ जेलिज़्या। नो डादुखर डादाकिन ब जेरैःजूयाव, आज्याल मनी जेथैजूया।

## 2

तयुं जैद खैद लिन्या

<sup>1</sup>जे ख्रीसस तोबो ताद जेयुंर झेंःद उलिकिन, जेल्योदा उयुं ओझाःज्यावनी जेस०र होलाँ ओताव ताकिन, जेस छैव पुरूस उलिज़्याव जेदार्सिउ ताकिन, जे जेल युं नान्या उलिकिन, <sup>2</sup>जे जेल तोबो युं तोबो क्यौं जैद प्राइँए ज़ तोबो येनत जेयुं थू जैव ताके। हो ताकिन ची डा मनी डारेंतए डायुंर होलाँ तान्या ले। <sup>3</sup>जे स०द क्यौंलाई वाज़ तान्या येनर काता ज़ तादोच्यो। बुरू सज़िमसिद क्यौंकिन छुतलाई ओमान नैद्याव ताके। <sup>4</sup>क्यौंए तिर वाज़ दान्या माःक, प्राइँलाई तान्या येन दाव ताके।

ख्रीस उसज़िमसिउ

<sup>5</sup>जे प्राइँए जेयुं येसु ख्रीसए उयुं मिताव ओताक।  
<sup>6</sup>नो भाःकिन ज़ परमेस्वरस तोबो ज़ निलिज़्याव।  
 ओहक परमेस्वरस तोबो ज़ उलिदी ब नो हकलाई माकमैद,  
<sup>7</sup>ओहकलाई रासुद,  
 रितो ज़ जैसिद,  
 मिँ मिन्सिद, परमेस्वरए ओसेवा दान्या जैसिके।  
<sup>8</sup>मिँ उमिन्सिउत झन ज़ सज़िमसिद,  
 सिन्याक पै परमेस्वरए ओपाँ भरी दोक्यो।  
 बनै दुखस क्रुसत सिन्या ब सहिक्यो।  
<sup>9</sup>है जैद परमेस्वरए नोलाई सोचोइद,  
 स्वर्गताव प्राइँरानी ओमान ल्यो पोल नैक्यो।  
 मिन भरिरानी प्राइँरानी घ्योःव मिन नैदिक्यो।  
<sup>10</sup>है जैद स्वर्गतावर, आव नामलावर, तलना नामलावर प्राइँ ज़

येसुए उमिनत याघूँदानी फुलुप्सिद,

11 येसु स्त्रीसलाई पाइँए ज़ 'प्रभु' है दोरिज़्यार।

ननी ज़ परमेस्वर ओबाबुए उमिन ब घ्योःन्या ले।

ज़गै जैज़्याव सोरो मितावर जेलिज़्या

12 जे डायुँलाव डानैं डामेरं, डा जेस डालिज़्याकाव जेदोज़्याव मिताव, डा डामालिक मनी झन ज़ नो दैद जेनेज़्याव साःरो जुनीलाई जेयुँ थू जैद सुदुमो ताके। 13 जेलाई उयुँलाव मिताव येन दाव परींज़्याव ब ओल परमेस्वरए ज़, धामा दान्या युँ जैद्याद सुदुमो परींज़्याव ब ओल परमेस्वरए ज़।

14 है जैद जेदोज़्याव येन भरित मारूमरूमैद माइसिद चावस दोच्यो।

15 हो ताकिन ची जे परमेस्वरए ओज़ार जेखत माल्यो छैवर थोरिन्या जेले। आव मानुवाताव यायुँ बिप्यादा ताःसिउराए खार्ल ब जेलाई सुए ज़ जेपाँःच्या पलेःद्याधुन्या मालेर। बुरू नितावराए खार्ल चुम चुमोलाई ज़गै जैज़्याव सोरो मितावर रैःन्या जेले।

16 जीवनलाव पाँलाई पक्कास क्योःद जेनेकिन स्त्रीस फरी उहुव छ्याम जेक्याँताव डादोव येन भरी अनाकलाव ओमाताव ओल्यो लिद डासुनी च्याँःसिरिज़्या। 17 डालाई यासैःनादी ब डाजुनी अनाकलाव तान्या माले। जेजुँनी डादोव भरित परमेस्वरलाई डाजिउ डाचरैःव मिताव ज़ तान्या ले। ननी ज़ डा खुसी ताद जेस डारेंज़्या। 18 हिताव ज़ जे मनी आव पाँरात खुसी ताद, डा किताव डारेंज़्या, जे मनी डास रेंचिके।

जेल्योदा तिमोथीलाई डापरींज़्या

19 प्रभु येसुए उयुँ ओताकिन डा तिमोथीलाई जेल्योदा चाँदो ज़ परींव डापैंज़्या। जेस दैसिद जेथा ओरैकिन डायुँ होलाँ तान्या ले।

20 जेल्योदा साचो उयुँ थू जैज़्याव तिमोथी स्यासो छुतर डास

सु ज़ मालेर। <sup>21</sup> उपुर्कावर ते येसु ख्रीसए ओयेनकिन यायेन वाज़ चिऊज़्यार। <sup>22</sup> तिमोथी ते उगुनर रें:व, थंरिउ उलिज़्याव, जे ज़ जेसैज़्या। डास परमेस्वरए चाव ओथा सथैन्यात ज़ा बाबु स्यासो ज़ गिन्लिज़्या। <sup>23</sup> है जैद डा आव क्यो:सिद डालिज़्यावल 'डालाई अइ तारिज़्या' लिन्या डसैवत जेल्योदा हतपूत ज़ डापरीरिज़्या। <sup>24</sup> प्रभुए उयुँ ओताकिन जेल्योदा चाँदो ज़ हुन्या डाले लिन्या आस ब लिज़्या।

इपाफ़ोदितसलाई रेंद सुमो ताके

<sup>25</sup> आव है डालिज़्याव भरी ओमाताद ज़ इपाफ़ोदितसलाई जेल्योदा डापरींज़्या। नो डालाई चिऊना जेपरींव मिँ डाभाइ स्यासो ब लिज़्या, परमेस्वरए ओयेनत डानै ब लिज़्या, ख्रीसए उधूँल डास तोबो सिपाई मिताव ब गिन्लिज़्या। <sup>26</sup> खाली नोए जेजूनी 'किताव लिज़्यार' लिद उयुँ थू जैज़्याव। सोनो, जे 'ओजोरो हुज़्या दी' लिन्या जेथैवए 'डासोगोत लिज़्याखेरहो' लिद आतिज़्या। <sup>27</sup> नो जेथैव मिताव ओजोरो ते उहुव ज़। नो ओजोरोए कोज़ाइ ज़ सिके। हा:त ज़ परमेस्वरए उयुँ नाद बाँचैक्यो। ओललाई वाज़ मा:क, परमेस्वरए डालाई मनी उयुँ नाके। नो उसिउ ताकिन डालाई सोगोए तर्त सोगो तान्या ओल्यो। <sup>28</sup> है जैद 'नोलाई रें:द जेयुँर होलाँ घताक' लिद हतपूत ज़ जेल्योदा डापरींज़्या। हो ताकिन डा डायुँ ब होलाँ तान्या ले। <sup>29</sup> नो मिँ प्रभुए उमिनताव ओतावए जेल्योड उहुवत रेंद सुमूच्यो। आव मिताव मिँरालाई यामान नैद्याव ज़ परिए। <sup>30</sup> काराव ल्यो ताकिन जे डाजूनी दाव जेपैंज़्याव येन सयो:द्यान्याए जूनी नो मिँ उजिउए मया मादाद ख्रीसए ओयेनत कोज़ाइ मानी सिके।

### 3

परमेस्वरए उयुँलाव मिताव तान्या

<sup>1</sup>डानै डामेर, गेप्रभुस तोबो ताद रेंद ज़ लिचिके। डसरो पाँर दोहोरैन्यात डार्च्या मासिए, जेलाई माचावनी जोगोइन्याए जूनी

ज्ज लिज्ज्या। <sup>2</sup> नो परमेस्वरए ओपाँ बलेज्ज्यावरास जोगोइसिद लिच्यो। नोर काः स्यासोर लिज्ज्यार। नोराए, 'क्याल्न्या सरेस जैसिउर वाज्ज परमेस्वरए ओथोल ताज्ज्यार' है यारादोज्ज्यार। <sup>3</sup> खाली परमेस्वरए साचो ओसरेस दैवर ते गे ज्ज गेलिज्ज्या। गे परमेस्वरए उपुरुस दैद उयुंलाव मिताव ओसेवा दाद येसु ख्रीसए ओक्याँत ख्यासिद गेलिज्ज्यावए गेलाई पाखाताव सतैन्या सरेस माचाही।

<sup>4</sup> हैदी ब डा मनी, 'डानी ज्ज परमेस्वरए ओथोलाव डाताके' है लिन्या ताकिन उपुर्कावराकिन डा झन ज्ज है डालिधुखेहो। <sup>5</sup> डा हिब्रू जातलाव, बेन्यामीन थरल जर्मिउ मिं ज्ज। यहूदीराए याचलन मिताव डाजर्मिउ आथ दिनत क्याल्न्या सरेस ब ताके। है जैद जातनी सघ्योःसिन्या ताकिन प्राइरानी घेप्पा जातलाव डा ज्ज। मोसाए ओकानुन दान्यात फरिसी ज्ज डाल्यो। <sup>6</sup> 'इतावनी ज्ज परमेस्वर खुसी ताए सै' लिन्या डम्सिद मन्दलीलावरालाई क्योःए क्योःए इयालखानाल ब डाराझाःज्याव। मोसाए ओकानुन भरी ब माबिरैद ज्ज डादोज्ज्याव।

<sup>7</sup> हिताव येन डादोज्ज्यावत ज्ज ख्रीसलाई दैन्याए जूनी नो डादाडाव डाकमैव धर्म भरी अनाकलाव थरैद डारास्के। <sup>8</sup> होकिन झन डाप्रभु येसु ख्रीसस सरेस्सिद ओलस सखैसिन्याकिन उपुर्काव येन भरी अनाकलाव ज्ज थरैद, नो डादाडाव डाकमैव धर्म भरी की सीद याख्याज्ज्याव मिताव ज्ज डाख्याके। <sup>9</sup> डा है डालिज्ज्या, तछा परमेस्वरए ओडाक डाच्योःसिक नो मोसाए ओकानुननी डाकमैव धर्मनी तारैःनावक। बुरू ख्रीसलाई डायुँ उहुबोनी ज्ज उयुंलाव मिताव उरैःनावक। <sup>10</sup> डा डायुँ ख्रीसस सरेस्सिन्यादा वाज्ज लिज्ज्या। डा डाजूनी दुखस सिन्या पै सहिद ओयाँव मिताव डा ब होए ओयेनत डासहिधुक, सोनो, परमेस्वरए ओल ओसक्तीनी ख्रीसलाई सिउनी ओसोचोइव मिताव डालाई ब साःरो ओजैनावक। <sup>11</sup> इतावनी ज्ज

ओल सिद सैसिदकाव ओदैव जुनी डा ब डादैधुक ।

डा डादोज्ञ्याव मिताव दोव ताके

12 डा चबनै ख्रीस स्यासो साःरो ताद डाखत माल्यो डाताधुके है डामालिधुइ । हैदी ब डा येसु ख्रीसए ओपैज्ञ्याव मिताव कातानी डासयोःके लिद सैःसिवा जैसिद डादोज्ञ्या । 13 डानै डामेर, परमेस्वरए ओपैज्ञ्याव मिताव आःपै ते डामासुदुम्ताए । खाली आव तोबो वाज्ज डादोज्ञ्या, ताधुव भरी मेंःद हुन्यादा वाज्ज डाताकिज्ञ्या । 14 किताव बाजी दैन्याए जूनी धोंःन्यात यादाँजिसिज्ञ्याव, हिताव ज्ञ डा मनी स्वर्गताव बाजी दैन्याए जूनी परमेस्वरए येसु ख्रीसनी ओराखुल्ज्ञ्यावदा धोंःनाव ज्ञ डालिज्ञ्या ।

15 है जैद जे परमेस्वरए ओपाँत थंरिद लिज्ञ्यावर मनी जेयुँ नदा ज्ञ थू जैव ताके । जेनी र्खा र्ख्वार निताव युँ ओमालिकिन परमेस्वरए ओल ज्ञ जेलाई सम्जैन्या ले । 16 खाली गे परमेस्वरए ओयेन खा पै गेसैज्ञ्याव, हाःपै ज्ञ दाव ताके ।

17 जे डानै डामेर, डा डादोज्ञ्याव मिताव जे ब दोव ताके । गेपैचिउ मिताव येन दोज्ञ्यावराए ल्योनी मनी सिऊसिउ ताके । 18 कुधुए ख्रीस क्रुसत उसिउ है लिन्या पाँलाई सोद बारिज्ञ्यार । निताव बारिज्ञ्यावराए जूनी डादाकिन ज्ञ है दाव ज्ञ डानैचिज्ञ्याव । फरी ब डायुँ घर्द है डादाचिज्ञ्या । 19 नितावरालाई नोक्सान वाज्ज तान्या ले । नोराए परमेस्वरए ओपोल झन जो यार्युँनी हुज्ञ्या, हो ज्ञ खिमूज्ञ्यार । लाज हुन्या येनत झन ज्ञ खुसी ताज्ञ्यार, आव मानुवाताव पारादा वाज्ज यार्युँ थू जैज्ञ्यार । 20 खाली गे साचो गेझिम ते स्वर्गत लिज्ञ्या । हुनी ज्ञ गेलाई बाँचैज्ञ्याव कींद गेनैज्ञ्याव गेप्रभु येसु ख्रीसए चिहुसिरिज्ञ्याव । 21 उहुव छचाम नो नाम नमलाव लिज्ञ्यावरालाई उधूँल ओराझाःव ओसक्तीनी ज्ञ आव गमे जैसिउ गेक्यार मनी तोद्याद ज्ञगैव ओक्यार मिताव ज्ञ जैद्यासिरिज्ञ्याव ।



## 4

## मासखैजूयाव पाँलाई रासून्या

1है जैद डानैँ डामेर, हिताव दैन्या स्यासोर गेतावए परमेस्वरए ओपाँत थ०रिद ल्यो ताके। जेस खर्क दैसिन्या लिद डालाई जेमया बनै लागिजूया। डादोव भरी जेक्याँत ओरैःवए डायुँ होलाँ ताद डामुनी च्याँःसिउ ज़ लिजूया। 2 खाली जिन इयोदिया सोनो सुनुतुखेनिलाई है डादाचिन्जूया, जिन प्रभुए ओपैजूयाव मिताव खैद लिचिन्के। 3 नँ डामे नारिसिजूयाव साचो डानैँलाई मनी है डादींजूया, आव मेंमानिलाई निसखैयो। चाव था सथैन्यात नोनी डालाई कुधु सधैनाकिनी। नोनिस क्लेमेस ब ओल्यो। छुतर ब सर्बा ज़ याल्यो। आव भरिराए यामिन अजम्बरी जुनीलाव पोस्तोकोल सर्सिउ लिजूया।

## याका दान्या पाँर

4प्रभुस तोबो ताद एकतार रेंद ज़ लिच्यो। फरी ब है डादाचिजूया, रेंद ज़ लिच्यो। 5 जे बोमो युँनी जेदोजूयाव पाइँराए ओसरेस्चिरक। गेप्रभु चाँदो ज़ हरिजूया तामेःच्यो। 6 जे वीनी फुइ ताताच्यो। बुरू पाइँत ज़ धन्याबाद चरैःद, जेचाहिजूयाव भरी पोंखारिद ओलस निचिके। 7 हो ताकिन ची जे येसु ख्रीसस सिप जेतावए परमेस्वरनी हुजूयाव सैँ ज़ मासैँधुन्या युँ होलाँनी ज़ जेयुँ जेबिचारलाई जोगोइद नैद्यान्या ले।

8अब ते डानैँ डामेर, जो पाँ चाव लिजूया, जो पाँ थ०रिउ लिजूया, जो पाँ साचो, छैँव, ओपाँःच्या माल्यो लिजूया – नो पाँ असली, उगुन ल्यो उलिकिन जेयुँ होत ज़ थरैव ताके। 9 डा डाल्योनी पैसिद जेदैव पाँर सोनो डा डादोजूयाव भरी किताव जेरैःव, किताव जेथैव जे ब हितावनी ज़ दोच्यो। हो ताकिन ची गेयुँ होलाँ जैद्याजूयाव परमेस्वर जेस ज़ तान्या ले।

जे डालाई जेमामेःनाए

10 डाल्योदाडाव खेसो जेयुँ फरी जेजागैवए डायुरँ होलाँ जैद परमेस्वरलाई धन्याबाद डाचरैःजूया। जे डालाई मेंःनाकेर है डालिजूयाव ते माःक, खाली डालाई सघैन्या मौका जेमादैवए ची। 11 डालाई कातार ओमाथैनाजूयावए है डालिजूयाव ते माःक। जो मितावल तादी ब सोन्तोकोस लिन्या पैसिद डाले। 12 डा दुखल तादी ब, सुखल तादी ब, जूयाद तादी ब, करे तादी ब, ल्योल तादी ब, माल्योल तादी ब, प्राइँल ज़ डालिधुइ। 13 जो मितावल तादी ब परमेस्वरए ओयाँजूयाव ओसक्तीनी प्राइँ ज़ डादोधुइ। 14 हितावत ब डा डादुखल जे जेचिऊनावए चाव ज़ ताके। 15 जे ज़ जेसैँजूया, डादा जे फिलिप्पीरालाई परमेस्वरए चाव ओथा सथैद माकेदोनियानी डाबाजूयाक डालाई सघैन्या छुत मन्दलीर सु ज़ यामालिजूयाव, जे वाज़ जेल्यो। 16 डा थेसलोनिकेल डालिजूयाव बेलाक मनी डालाई माथैव मायोःवराल परीँद्याव ज़ जेनैके। 17 खाली डा जेल्योनी कातार दैन्या डापैँजूयाव ते माःक, बुरू जेलाई झन ज़ असिक घताक है डालिजूयाव ची। 18 अब ते डालाई चाहिजूयाव भरी प्राइँ ज़ लिजूया, धोल पोगोल ब ताद ले। नो इपाफ्रोदितसए उकुइत परीँद जेयाँव भरी डादैके। डालाई परीँद जेयाँव भरी परमेस्वरए उयुँलाव मिताव ताद ओल परमेस्वरलाई चाव सी डरो जेचरैःव मिताव ज़ ताके। 19 डालाई सयोःद्याजूयाव परमेस्वरए जेलाई मनी माथैव मायोःव भरिल येसु ख्रीसए स्वर्गताव ओधननी ज़ सयोःद्यान्या ले। 20 परमेस्वर गेबाबुलाई खर्क ज़ माखेमन्या ज़गै मगै ओताक। आमेन।

### तुपैन्या पाँर

21 येसु ख्रीसए उमिनत लिजूयावरालाई जेरो है यारादोच्यो। डास लिजूयाव डानैराए मनी जेलाई जेरो है दाचिजूयार। 22 आव सहरलाव ख्रीस येसुए छैँव उमीं भरी सोनो प्राइँरानी ते रोमी माहाराजाए

फिलिप्पी 4:23

11

फिलिप्पी 4:23

उङ्गिमलाव येन दाङ्गयावराए जेरो है दाचिङ्गयार।

<sup>23</sup>गेप्रभु येसु ख्रीसए उयुं जेल्योदा ओगराँक, जेयुँल बास ओदोवक।

**सा:रो बाचा**

Kham, Western Parbate: सा:रो बाचा (New Testament)

copyright © 2015 Wycliffe Bible Translators, Inc.

Language: (Kham, Western Parbate)

Contributor: Wycliffe Bible Translators, Inc.

Promotional text filled to upload to DBL.

All rights reserved.

2020-11-18

---

PDF generated using Haiola and XeLaTeX on 30 Dec 2021 from source files dated 30

Nov 2021

258cde44-1703-5da4-948d-94a8b2e9b9dd